

Li Laus

A large yellow eight-pointed star is centered on the page. Overlaid on the star is the word 'Felibrige' in a bold, blue, serif font. Behind the star and text is a faint, grey, circular watermark containing the word 'Felibrige' and the word 'Original' in a script font.

Felibrige

**LAUS
DE
Francés MOURET**



Gabriéu BRUN
Felibre Majourau

LAUS
DE
FRANCÉS MOURET
(1924 – 2044)

Cigalo de la Patrìo

Santo-Estello de Niço
Annado 2016

CIGALO DE LA PATRÌO

1881

Paul GAUSSEN (1845 – 1893)

1894

Gaston JOURDANNE (1858 – 1905)

1905

Marius BACQUIÉ-FONADE (1854 – 1910)

1911

Léopold VABRE (1864- 1936)

1936

Pierre CAUSSE (1883 – 1951)

1952

Gorges MARTIN (1905 – 1981)

1982

André DUPUIS (1924 – 2004)

2005

Francis MOURET (1924 – 2014)

2015

Gabriel BRUN (1951

**Gènto Rèino,
Segne Capoulié,
Car Counfraire,
Cars ami felibre,
Midamo e Messiés,
Dono Mouret, Messiés e famiho Mouret,**

Vous voudriéu dire lou grand bonur que lou Counsistòri m'an fa en m'elegissènt Majourau, titulàri de la cigalo de la Patrio. Pèr iéu es quicon de remirable que sarai pas lèst de desoubliada. Apounde que farai moun proun pèr pas deçaupre mi counfraire e pèr n'en èstre digne.

Ai agu la crespino d'èstre peirineja pèr tres peirin de triò, la Majouralo Mario-Nadalo Dupuis, assessour dóu Felibrige de Lengadò-Roussihoun, qu'es ma meirino tambèn de felibre mantenèire, e que m'a bèn ajuda dins ma caminado felibrenco au sen de nosto Mantenènço de Lengadò-Roussihoun.

Pièi lou jouine Majourau Valèri Bigaud qu'avèn sèmpe discuti e escambia emé simplecita, mai pas sènso grand plasé, d'abord qu'es un ome forço apassiouna, un felibre de la bono, coume se dis.

E moun peirin tresen : es musicaire, counferencié, istourian e que sabe iéu encaro, es lou dinami Majourau Michèu Benedeto qu'ai forço estimo pèr éu, pèr sa sapiènci, soun enavans e soun gentun.

Gènto meirino e gènt peirin vous gramacié dóu founs de l'amo pèr tout lou bèu que m'avès pourgi.

Fau mi gramaci di mai courau i Majourau qu'an vouta pèr iéu au Counsistòri de la Roco-Brou, vous gramacié de la fisanço vostro que me pourtas, e proumete que farai moun proun pèr pas vous deçaupre.

Acò di, coumprene e respète li decisioun de li qu'an pas vouta pèr iéu, mai de-segur qu'acò m'empachara pas de travaia coutriò em'éli.

Voudriéu apoundre tambèn que siéu mai qu'urous e fièr pèr la cigalo dóu Ventour qu'avès atribui à moun ami Jan-Bernat Plantevin que bèn-astrugue dóu founs dóu cor.

MI DAVANCIÉ

PICHOT ISTOURI DE LA CIGALO DE LA PATRIÒ E SOUN “ESCOURREGUDO NOUVIALO”

- La Cigalo de la Patriò es uno cigalo di mai lengadouciano, car fuguè pèr lou cop proumié, en 1881, espingoulado au vestoun de l'Alesen, journalisto, bibliotecari, Pau Gaussen. Pau Gaussen nascu e mort en Alès (1845-1893) èro un gardés de la bono, nous a leissa manto uno obro pouëtico e tiatralo coume : “La fiero de Chambourigaud”, “La camisardo”, “Li miràgi”, “La pèiro bavardo”, “La fiero de Sant Bartoumiéu”, “Camisos e Courdeliès”, pièi uno cansoun : “Estivenco” e acabara pèr “Rouland” qu'es un dramo en 4 ate.

- Après, en 1894, se venguè pausa sus l'avoucat, dóutour en dre, sustitut e Maire de Carcassouno Segne Gastoun Jourdanne. Gastoun Jourdanne (1858-1905) èro de Carcassouno fuguè tambèn mèmbe de l'Acadèmi di Jo Flourau. Nous leissè uno obro chanudo, literari, istourico e geougrafico subre sa vilo de Carcassouno, un laus e un estùdi subre lou revèi pouèti dis idioma d'O, d'oubrage sus lou Felibrige emé L'evoulucion felibrenco, Istòri dóu Felibrige, Bibliougrafio lengadouciano de l'Audo, Countribucion au fôuclore de l'Audo e que sabe iéu encaro.

- À la despartido de lou d'aquí en 1905 la cigalo de la Patriò s'es envoulado de-vers Toulouso pèr ounoura Segne Marius Bacquié-Fonade. Nascu e mort à Toulouso (1854-1910). Bacquié-Fonade èro lou foundadou de l'Escolo Moundino e paire de manto uno acioun felibrenco moute s'investissié remirablamen. A forço coulabora à manto uno revisto e journau d'O, daumage qu'a pas edita si precious estùdi.

- La Cigalo de la Patriò nous revèn à Cournelian d'Eraud pèr destingui Leoupold Vabre, medecin e l'un di foundadou de la Cigalo Lengadouciano, erian en 1911. Leoupold Vabre, nascu e mort à Cournelian (1864-1936), editè “Lous cants d'uno cigalo, (emé letro pourtissoun de Frederi Mistral) e “La festo des troubadours bezierencs”.

- Pièi, ounourara en 1936 lou pitre de Segne Pèire Causse viticultour à

Mount-Pelié. Pèire Causse nascu e mort à Mount-Pelié (1883-1951), restavo au Mas di Felibre ounte faturavo si vigno, nous leissè, dins soun parla lengadoucian, pouèmo, proso e cansoun emé : “Vers la terra, Centenàri dau Cardinal de Cabrières, Cansous dau pople, Jan se marida, Nadaus lengadoucian, Janetoun, La campana, La vendemia, Sus la grand routa, Ma gleiseta ansindo que manto uno autro cansoun.

- En 1952, encaro mai proche de moun país d’Aigo-Morto, la Cigalo de la Patrio s’es pausado sus lou pitre lengadoucian dóu Nimesen Jòrgi Martin, foundadou de la soucieta felibrenco “La Jouvènço Nimesenco” (1923), pièi la soucieta literàri “La Tour Magno” (1930). Jòrgi Martin nascu à Nime, mort à Mount-Pelié (1905-1981) vai nous leissa uno obro pouëtico e en proso mai la maje part sara estampado en lengo de la Republico e uno pichoto partido en prouvençau coume : “Dins li carriero au tèms passa” e “L’amelié de Nime”.

- En 1982 s’envoulè, gaire luen de Nime, pèr se pausa sus la vèsto de velout negre dóu Bouiarguè Andriéu Dupuis. Andriéu Dupuis nascu à Lioun, plantara caviho à Bouiargue enjusquo sa despartido, (1924-2004), èro un ome óusservable, saberu, courtés e di mai estima d’en tóuti.

Aqui noun pode cita aqueste ome de triò sènso escriéure quàuqui rego un pau mai chanudo sus éu, noun evoucarai sa drudo e remirablo vido proufecionalo, just assajarai de parla de si passioun, de l’amour qu’avié pèr soun país e l’amour qu’avié pèr li siéu. Lou Counsistòri l’elegiguè Majourau à la Santo-Estello de 1982 que se debanè dins aquesto bello vilo de Niço, resoun de mai pèr n’en parla.

Andriéu Dupuis (1924-2004) espeliguè dins uno famiho felibrenco, paire e maire èron felibre, d’efèt a sèmpre charra lou prouvençau emé li siéu. Aquest amour de la lengo lou fara rescountra li pouèto e gardian li mai grand de Camargo coume Folcò De Baroncelli, Jòusè D’Arbaud, Bernat De Montaut-Manse, e, pau à cha pau s’apassiounara d’aquesto vido pouëtico e gardiano. À sege an fai lou gardianou encò dóu Marqués, i’avié pas meiouro escolo que la d’aqui pèr pousqué liga sa fe de Roussatino e de Bouvino e soun amour pèr la literaturo prouvençalo camarguenco. Es dins aquesto memo fe de Bouvino que trevara de gènt

qu'an sachu marca soun tèms coume Ubert Iounet, Founfono Guilherme, li Reinaud, li Lescot, Loustau e uno moulounado de gènt apassiounant.

Se plasié de dire : “La Camargo es lou retra d'un ideau de vido, de bèuta, de valour que ié soun assoucia. Bandiguès-lèi pèr li besoun de l'interès endustriau e veirés s'esvali la maje part dóu tourisme liga à la Camargo”.

Moussu Andriéu Dupuis avié uno amiracioun prefoundo pèr la plumo encantarello de l'uno di mai grando pouëtesso dóu Miejour Farfantello



alias Enrieto Dibon, e quand la d'aquí, à l'autouno de sa vido, venguè avuglo es Segne Dupuis que ié legissié sis obro en ié baiant, à la demando de Farfantello, soun vejaire d'ome de letro. Ome de letro que nous leissè uno obro literàri de trio ounte n'acampè un vintenau de pouèmo e raconte camarguen d'un tèms esvali dins “La Cabano dis Estang” e de que dire de soun pouèmo “La preguiero gardiano” qu'escrivie en 1989 e que çai-souto vaqui :

LA PREGUIERO GARDIANO

1

De la palun ma voues t'apello,
Segnour que m'as fa coume siéu
Dins moun amo vanegarello,
Ai garda cregnènço de Diéu.

2

Ai pas toujours canta ta glòri,
Souvènti-fes t'ai renega,
Counèisses bèn moun espelòri,
Mèstre, sout ta lèi fau plega.

3

Souto ma cabano de sagno,
Ai, pas fa que prega ti Sant,
Siéu peginous, ai la malagno,
De viéure coume un sacripant.

4

Se m'es arriba pèr sansouiro
De béure un pau mai que se dèu,
Perdouno à l'amo pecadouiro,
D'un gardianas de daladèu.

5

Mai d'un cop, ai manca la messo,
Que deviéu courseja li biòu,
Ne m'en gardo ges d'amaresso,
Toustèms aparò moun oustau.

6

Fai que la grand porto azurencò,
De toun cèu bado largamen,
Davans moun amo camarguenco,
Quand mourirai, Segnour, amen.



LOU MAJOURAU Andriéu DUPUIS
Sieisen CAPITANI de la NACIOUN GARDIANO
(1990/2004)

Dins aquest pouèmo, lou Majourau a vougu temounia, que mau-grat qu'un gardian es siegue un "pau-parlo" o siegue un "gulaire", un ome dur à l'obro, mai un pau "souvage", que pòu sembla un pau bestiari mai amant la fèsto. es tambèn e subre-tout un ome au grand cor, bon, generous e que sa Fe de Bouvino, fin finalo, lou raprocho de sa Fe en Diéu.

Andriéu Dupuis partejo tambèn uno gènto e founso amista emé Riqueto e Enri Aubanèu, li rescontre e li vihado soun enflouri d'aneidoto de bouvino que s'acabon en felibrejado.

Si gràndi couneissènço, soun amour de l'obro bèn coumplido fara d'éu un eicelènt archivaire de l'Antico Counfrarié de Sant Jòrgi. Pèr li mémi resoun sara un grand Capitani de la Nacioun Gardiano, cita de-longo en eisèmples crese que pode dire que devendra lou Capitani referissènt pèr li que lou van sucedi.

En apareire di mai afouga voudè sa vido touto à l'aparamen e

l'espandimen de nosto idendita camarguenco, mai sa fierta proumiero èro bèn la de sa famiho que i'adusié tout lou bounur qu'un ome poudié espera de la vido.

Sa gènto mouié Margarido ié vai douna quatre enfant, Brunoun l'einat, Marc lou segound, Francés lou tresen e enfin la chato tant desirado Oudilo Alis.

Oudilo Alis, que, lou pode tourna dire, fuguè noumado Rèino dóu Felibrige pèr la Grando Laureato di Jo Flourau Oudilo Riò, à la Santo-Estello de Nime de 1990. Lou paire, mai tambèn lou Majourau qu'èro, fuguè forço pertouca de la recouneissènço felibrenco voudado à sa cadeto.

Vaqui ! Es subre aquèsti darrié mot adreissa au Majourau Capitani Andriéu Dupuis qu'acabe mi lausenjo e que reprene l'istouri de la Cigalo de la Patrio.

- En 2005 aquesto meravihouso cigalo s'envoulè en Avignoun pèr ounoura lou merite de Francés Mouret Cabiscòu de l'escolo Capouliero dóu Flouregue que beilejè 33 an de tèms. Fuguè tambèn, 24 an de tèms lou souto-Sendi de Prouvènço. Dono Mouret m'a di, un jour, touto la fierta de soun ome pèr aquesto Cigalo de la Patrio, pamens lou Majourau Mouret èro un grand saberu i diplomo multiple. Tout acò pèr dire, famiho Mouret, qu'aquesto Cigalo de la Patrio, qu'aro sus moun pitre s'es pausado, es uno bello cigalo e que ma vido touto ié farai ounour.

Adounc vaqui lou Laus de Francés MOURET (1924 – 2014) titlari de la Cigalo de la Patrio de 2005 à 2014 : Fiéu d'un musicaire de mestié, vioulounisto de triò à l'oupera d'Avignoun e tambèn coumpousitour. L'enfant Francés grandira au coustat embelinaire de la musico classico e trevara li chalant de soun grand peirenau qu'èro capelié, au 20 carriero di Marchand, ounte vai s'inculca d'uno vido urbano diversificado que ié baiara lou goust di gènt d'uno ciéuta boulegadisso. Amo aquesto toco emé lou mounde e apren de lis ama. Bono-di si grand meirau, que charravon de-longo lou prouvençau, mau-grat que quitavon de charra sa parladuro davans éu, s'embugara tambèn d'aquesto culturo prouvençalo

au cant embelinaire de nosto bello lengo e la gardara sa vido touto. Li gènt i'avien mes “Francés dóu Roucas”, car enfant avié coustumo de barrula de-longo proche la Roco di Dom, entendès “Le Rocher des Doms”.

Coume nous lou dis tant poulidamen sa gènto mouié Genevivo, Francés Mouret avié dous amour : Avignoun e Saut, avié coustumo de passa l'ivèr encò si gènt e l'estiéu encò si grand. Passavo dounc tóuti si vacanço escoulàri à Saut, vilajoun de la Vau-Cluso, sus lou pendis dóu Ventour e lou planestèu d'Aubioun, anciano capitalo dóu Coumtat dóu meme noum. Parié coume s'èro nascu dins lou vilage counaissié tout lou mounde e s'es amistousa emé tóuti. Sa passioun dóu tiatre ié fara founda uno assouciacioun que i'a mes “Lou Fougau de la Jouino Nesco de Saut”, ounte ié jougavon de pastouralo, de pèço de tiatre en lengo e cantavon de Nouvè de Saboly. La troupo se desplaçavo d'en tóuti li vilage à l'entour. Dono Mouret se remèmbro qu'èro estado lou vèire jouga, alor qu'èron meme pas enca marida. Segne Mouret quitè lou tiatre de Saut, pèr leissa soun beileja à-n-un ami, quouro fuguè moubilisa pèr la guerro, mai a sèmpe treva lis oupera.

Après aguè davera un bacheleirat literàri, faguè sis estùdi de dre à la Faculta de Mount-Pelié, n'en sourtiguè emé sa licènci e dous diplomo d'estùdi superiour de Dre publi e d'Ecounoumìo Poulitico. Sa tèsi de dóutourat en dre èro sus lis Estat Generau dins lou Coumtat Venessin à la vèio de la Revoulucioun Franceso. Sis estùdi lou menèron dins lou mestié d'avoucat, 47 an de tèms, e devenguè un flame aparaire di dre de l'ome, forço presa e recouneigu. Bastounié de l'Ordre dis Avoucat, fuguè tambèn ensenaire à l'Escolo Naciounalo de Dre e de Proucuro dis Avoua e au Cèntre de Fourmacioun Proufessiounalo dis Avoucat à la Cour d'Apèu de Nime. Fuguè destengui, pèr sa flamo carriero, Chivalié de l'Ordre Naciounau dóu Merite au titre dóu Menistre de la Justïço, e tambèn Chivalié dins l'Ordre di Paumo Academico.

Fasié partido de l'Acadèmi de la Vau-Cluso, qu'es uno soucieta sabènto creado en 1801, restè academician de noumbróusis annado e n'èro soun decan.

Sa poupularita e soun engajamen faran que beilejè manto uno assouciacioun loucalo d'Avignoun, n'en devenguè meme “Lou Presidènt de l'Unioun di Presidènt Avignounen”.

Grand espourtiéu, jouguè au foute-balo au clubè de baloun de Saut de la Vau-Cluso e n'en devenguè tambèn soun capitani, i'agantara bono renoumado e acabara sa carriero espourtivo dins li veteran. Fuguè, aussì, souto-President d'ou Clube Ipi de Saut, ounte se fasié courre subre-tout de coussò de chivau atala.

Se maridè emé Genevivo e aguèron dous drole, Felip l'einat e Vincèn lou cadet. Felip endraiara sa vido proufeciounalo dins li piado de soun paire, presentara sa tèsi à Nime e à l'ouro d'aro es avoucat en Avignoun. Inculca d'aquesto culturo prouvençalo vai founda l'assouciacioun Parlaren en Avignoun, vai edita un buletin, à sa debuto e pèr espargna li frès d'afranquimen fara lou pedoun pèr lou distribui. Vincèn, éu, a persegui l'obro de soun grand en reprenènt lou negòci de capelié que ié leguè sa grand après la despartido de soun espous. La capelarié au 20 carriero di Marchand es couneigudo dins la França touto, fuguè classado Mounumen Istouri de França, sa façado en bos e soun decor interieur de l'estile Louïs lou Segen, toujours parié despié sa creacioun en 1860.

Sara si Bèlli-Gènt, Oudeto e Andriéu Tartanson, felibre tóuti dous, que ié faran descurbi lou Felibrige. Segne Andriéu Tartanson nascu à Fourcauquié (1905 – 1999) restavo en Avignoun, èro avoucat tambèn e president d'ounour de Parlaren en Avignoun. Mèstre en Gai Sabé nous leissè uno obro d'un desenau d'oubrage. En 1959 lou mantenèire Mouret acoumpagnara soun bèu-paire en Arle e assistara à sa proumiero Santo-Estello. Pièi à la Santo-Estello d'Avignoun de 1964 rescountrara Moussu e Madamo Feuilla que lou faran rintra au Felibrige. En 1972 Francès Mouret s'encarto au Felibrige souto lou numerò 8960.

D'aquí intrè au Flourege, fuguè elegi souto-Cabiscòu, pièi Cabiscòu en 1981 e n'en restè au beileja 33 an de tèms. Bono-di soun engajamen felibren e soun enavans pourtara daut l'Escolo Capouliero dins lou respèt de l'èime mistralen.


En 1983, à la Santo-Estello d'Espalioun en Aveiroun, souto lou Capoulierat de Pau Rous lou counsistòri felibren ié decerniguè lou diploma de Mèstre d'Obro.

En 2005 à la Santo-Estello d'Iero dins Var, souto lou Capoulierat de Pèire Fabre, Francès Mouret presenta au majouralat pèr tres peirin de trio, Carle Roure, Roubert Rousset e Jan-Marc Courbet, sara elegi

Majourau dóu Felibridge titulàri de la Cigalo de la Patriò. Lou Majourau Francés Mouret sara forço pertouca de l'ounour que lou counsistòri felibren ié fai. Pourtara aquesto Cigalo d'Or emé grandò fierta, se fasié bon dire qu'aqueste grand diplomo de Majourau, que demié tóuti si noumbrous diplomo qu'avié pouscu davera èro lou d'aquí que n'en èro lou mai fièr.

Vaqui çai-souto lou counvit qu'avié manda à si counvida.

Vaqui ço que disié, en aquéu tèms, dóu Felibridge :



« Lou Felibridge es uno filousouffio e un ideau de vido. Mai la vido es en coustanto evoulucioun. Es uno règlo generalo que s'aplico en tóuti lis assouciacioun e mouvamen. Lou Felibridge noun i'escapo e ié fau s'asata i necessita dóu mounde e viéure emé soun tèms, mai sènso renega sis óurigino, soun passat, si principe, soun ideau, parteja pèr de generacioun. Lou miracle santestelen tiro au camin despièi 1854 e sa durado de vido es uno provo de sa vitalita mai o mens grandò segound li circoustànci. De tout segur lis elegi nouvelàri soun de bon besoun e porton sang nòu emé sis idèio e soun esperiènci terradourenco. Aquelo

mescladisso a un efèt pousitiéu. Noun pode n'en dire mai à l'ouro d'aro. Mai de tout biais après li manifestacioun ufanouso de 2004, lou Felibrige se dèu de regarda davans dins uno perspeitivo de judice, d'avisamen e de tenesoun pèr la defènso de la lengo, de la culturo e de l'identita nostro dins la vertadiero draio Mistralenco. »

Aquesto pensado dóu Felibrige dóu Majourau nouvelàri Francés Mouret, i'a vounge an d'acò, se raprocho de la miéuno, "jouine" Majourau emé moun sang nòu, mis idèio e moun viscu terradouren, e m'ajudo pèr teni bon l'empento dins ma caminado felibrenco, e dins l'espèr d'adurre ma pèiro à la mount-joio dóu Felibrige.

Lou Majourau Mouret nous leissè pas d'obro literàri, mai èro lou cap-redatour de la revisto "Lou Flouregian" qu'enflourissié de bèus article.

Voudriéu gramacia, dóu founs dóu cor, sa gènto véuso Dono Genevivo Mouret, si bràvi drole Felip e Vincens Mouret pèr soun gentun, pèr sa tant gènto espitalita e pèr lis entre-signe tant precious qu'an pres lou tèms de me trasmetre emé forço avenènço. Voudriéu tambèn faire lou sarramen, à-n-aquesto famiho, de sèmpre faire ounour à-n-aquesto Cigalo de la Patriò que despièi 1881 s'es toujours pausado sus lou pitre d'ilùstri davancié e lou Majourau Francés Mouret n'èro pas lou mendre.

Vous gramacié,

Majourau Gabriéu Brun,
Cigalo de la Patriò,
Sendi de Lengadò-Roussihoun
Camin dóu Grand Courbiero
30220 Aigo-Morto
felibrige.languedocroussillon@orange.fr
www.felibrige-languedoc.fr

Niço lou 15 de mai de 2016